

**Anwar tidak konsisten – PM
Utusan Online
18 Mac, 2012
Oleh ABDUL MUIN SAPIDIN dan KHAIRUL ABIDIN NUAR**

IPOH 17 Mac - Keengganan Datuk Seri Anwar Ibrahim berdepan dengan pengendali portal *Malaysia Today*, Raja Petra Kamaruddin sebagai panel dalam forum anjuran WikiLeaks membuktikan Ketua Pembangkang itu seorang yang tidak konsisten dalam percakapan dan perbuatannya.

Perdana Menteri, Datuk Seri Najib Tun Razak berkata, hakikat itu jelas kerana Anwar sering mengangkat dirinya sebagai orang yang memperjuangkan prinsip demokrasi dan menuduh kerajaan tidak bersifat terbuka.

"Nampaknya dia tidak sanggup berdepan dengan Raja Petra. Ini maknanya kita mesti konsisten, yang mana dia selalu persalahkan kerajaan, kata tidak demokratik dan tidak terbuka.

"Tetapi daripada segi tindakan, tidak membenarkan atau mengharamkan sesetengah akhbar hadir sidang akhbar mereka, apakah itu konsisten dengan apa yang diluahkan selama ini?"

"Kali ini, timbul pula dia tidak mahu orang duduk sekali dengan dia, jadi nampak apa yang dia cakap dan apa yang dia lakukan itu tidak konsisten," katanya kepada pemberita selepas merasmikan bangunan baru Sekolah Jenis Kebangsaan Cina Wan Hwa II di sini hari ini.

Najib diminta mengulas pendedahan Raja Petra yang mendakwa digugurkan daripada senarai ahli panel sebuah forum di Kent, England hari ini, atas permintaan Anwar.

Forum yang membincangkan senario politik global dan dirakamkan untuk dokumentari laman web WikiLeaks itu turut mempertemukan pengasasnya, Julian Assange dan Anwar menerusi komunikasi Skype.

Raja Petra mendakwa, beliau menerima panggilan daripada Wikileaks berhubung penolakan Anwar dengan kehadiran beliau sebagai ahli panel.

Sehubungan itu, Raja Petra menyifatkan tindakan Anwar itu sebagai 'pengecut' kerana bimbang perbincangan tersebut akan membangkitkan isu politik semasa tanah air.

Perdana Menteri berkata, sikap Anwar itu lambat-laun akan dipersoalkan oleh rakyat.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0318&pub=Utusan_Malaysia&sec=Politik&pg=po_01.htm